

YAKOBU ME LETA

1 ¹ Cane Yakobu säne, Acejiyame piiyepu mime Yageyame Yeesu Keriso teeme kaakesea bägrä gäne.

Sebore iyeta Acejiyame me binamewale! Weene lui weeme gawe ne ituge abmala, page gawe maramara cabu inajininige, aghesa căme mene weeme tääpume.

Weene Apicetnera ne Ngenecu Miiji cama Jääpänuye

² Căme ätrunga binamewale, maramara apicetnera bine liba jääpänemuye, piba ngenecu gege läbitininuye, ³ingle weene umle gemi egä weene liba pui mäpu cabu ca läsecrärinuye, weeme ätrunga te peei cabu ca kokre me läbituge mäpu cabu ämyemutaname. ⁴ Peei name pi ngenecu kokre cama imyemutepi ngälu pui mäpu cabu ca äsecrera. Weene piba amacetnäjäneji inajininuge, piiyepu kokre ätrunga cama weene miiji gemi nuuja apicetnera cabu ca cuta äsecrera. ⁵ Weeme yepä te liba singi umle äbitame Acejiyame me singi poto cidi me, tabe miiji Acejiyame ne ätemla, lui te baborage singi gyene iyeta biname bine umle ceerame. Tabe peei umle ne owecu cama papa yääcäruge. ⁶ Apu gone ngene jwaatwananinuye egä, “Acejiyame pama singi lica gyene cebine ätityerame,” yepä Acejiyame ne toraca jäätrunguye, piba taatu yäätemluye teebine. Lui te liba ätrunga căco, teeme ngene atwanena piba epu pana yaanajuge malu cabu uule baawe liiyepu. Gobe te yaacenanuge puma cita ca cuta saawecnistuge. ⁷⁻⁸ Pui biname me ngene atwanena äblicăco cängenarage äbita. Tabe ngene jwaatwananuge egä, “Pama toraca gyene, coo piiyepu pama walya gyene.” Pepu ngenecu onya biname te äblicăco Acejiyame bau ca teeme singi ne päpäna.

⁹ Yoo, ätrunga biname lui cina babo lica gemi ai gawecewe biname bime ngene atwanena cabu, teepi miiji ngenecu gege cama yaacrajuge, ingle naace popi teepi matimati lica gemi Acejiyame me opo gaabe je. ¹⁰ Cuta piiyepu ätrunga biname lui cina dogwe yaacrajuge gwidape tääpume, teepi miiji umle cama lenajame egä teeme bucurage rarekaake piiyepu gwidape iyeta lui papa gemi Acejiyame me opo gaabe. Peei ngene atwana te miiji teebibine ngenecu gege me wawena. Dogwe biname

bime lenaja lui epu pana tuube birige baace popo me liiyepu. ¹¹Yoo, liba bimu te nuunu cama tuungenutuge, gije ne jaadaromtuge, popo cina tamyanuge, piba teeme miijirage opo lica birige, siige. Dogwe biname cuta pepu gemi; teeme ai gawecewe cabu ireclota lui lecarage lica gyene. Teepi budre pa läbitipesi teeme kaakesea gaabe cabu liba waatni-nusi rarekaake päpäname.

¹²Baborage ngenecu miiji pisi nyene pui biname bime täápume, lui cina toraca gaabe ne lica yaabmalusi niya mule wawename, teepi liba apicetnera cabu je. Teepi iyeteta ireclota ne cirege päpäna, Acejiyame lipu ituge jaji eei bine ceerame, lui cina babo singi gemi teeme täápume.

¹³Apicetnera cabu ca, liba biname te angletneja jääpänuge niya mule wawename, tabe äblicäco piba apu iicana egä, “Ai angletneja lui Acejiyame bau ca gyene.” Acejiyame pepu muleyame lica gyene. Niya mule te äblicäco teebine angletneja, cuta piyepu tabe licarage nuuja biname ne yaangletnäjuge. ¹⁴Yepä, angletneja te täduge biname me ngene atwanena cabu ca, biname me niyarage singi te liba teebine toraca gaabe cabu ca yääyebingituge. ¹⁵Peei niyarage ngene atwana cama biname te puma cita ca niya mule bine jaawenemuge. Pui niya mule bime daremu lui budre gyene, cuta peei ingwe ca pui biname te niya puupu cabu me läduge.

¹⁶Yoo, cäme ngenecurage ätrunga binamewale, gone weemämu langletnäjinuye egä, “Acejiyame bau ca gyene ai niya.” Eewe, mine iyeta umle gemi egä Acejiyame pepu muleyame lica gyene. ¹⁷Lui gwidape gemi miiji piyepu epucäco, peei cina saacluge cabu ca Acejiyame bau ca. Tabe lui te iyeta cabucewe apaclyera gwidape bine itu tewenemuji, tabe äblicäco mara pana äbita. Tabe cuta äblicäco mibibine kaake ca äcelyerame. ¹⁸Teeme singi cabu tabe mibibine teeme bägräwale täápume ituge wawena, mine liba teeme toraca mene nitacijinininuju. Mine lui niinäce gaabe temi iyeta teeme nuuja waweneca gwidape cabu ca teeme singi pana äbitame.

¹⁹Yoo, cäme ngenecurage ätrunga binamewale, weene ai mule ne ecateye egä, iyeta biname cina miiji mene wata ätecijame, yepä gone mene wata jicemusi, cuta piyepu gone claabe me wata läbitininusi, ²⁰ingle naace popi claabe biname te äblicäco Acejiyame me singi ne conocäco wawena. ²¹Peei name pi iyeta jugijugi mule piyepu iyeta niya mule weene iyebngemeye. Ngenecu plowa cama teeme mene yaacatuye, tabe lui mene singi gyene weeme ngenecu cabu acitame, inge pui mene te piba weebibine niya cabu ca äsecrera gaabe jiwabininuge.

²²Mine umle gemi egä mine miiji pui mene ibi jaawenesi, lica ätecija taatu. Gone weemämu langletnäjinuye egä ätecija taatu lui ibibi gyene. ²³Pui biname lui te ätecija taatu läbituge, yepä lica jaawenuge, tabe epu pana biname te opo lipu mäali cabu läpänuge. ²⁴Tabe liba nuuja gome

me läduge, piba wata ngene jäätrimaluge teeme opo lipu gyene. Yoo, biname lui te mene yäatecijuge, yepä tabe singi lica wawename, tabe piba peei opo pana pui mene ne wata ngene jäätrimaluge. ²⁵Yepä, lui biname te conocäco cotre cabu cängenarage läwecetnäruge lui cotre te biname bine yääsecräremuge, piyepu tabe pui mene jäje labiberäjemuge, tabe piba lica ingwe ca ngene jäätrimaluge, yepä peei mene pa jaawenepi. Acejiyame teebine pa yäätityärepi iyeta teeme miiji waweneca cabu.

²⁶Lui te jiicuge egä, “Cane Acejiyame me biname gäne,” yepä lica teeme tage mene cängena ire, tabe teemämu langletnäjuge; teeme mule toraca lica gyene. ²⁷Mime Aceji Babe me opo gaabe lui mule toraca gyene piyepu conocäco agesa: emlame bägrä piyepu cuublacubla bine teeme mäpu cabu ca ätityerame, cuta piyepu ai gawecewe lenaja cabu ngenecu iyeta Acejiyame bau me acitame.

Iyeta Biname bine Yepä pana Ire Jaatwemuye

2 ¹Cäme ätrunga binamewale, lui cina mime jamyacu apaclyera cama Yageyame Yeesu Keriso ne jitrungeniye, weene iyeta biname bine yepä pana ire jaatwemuye. ²Apu mule gone. Dogwe biname te weeme abasecretna mete cabu me liba labacituge, miijimiji cäbletääpe cama piyepu oplacmeläja gwidape cama teeme ime kukluta cabu; piyepu nuuja biname te liba ränderände cäbletääpe cama labacituge, ³weene liba dogwe biname ne cängena ire jaatwuye, teebine jaajuye egä, “Agesa miiji puupu adnatame,” yepä pui gwidape cäco biname ne jaajuye egä, “Miiji adnata puupu ibibi lica gyene, maane nää äblicäco peema aclajuteji lenajame, coo gawe cabu adnatame cäme ernge gome?” ⁴Weene liba pepu mule jaawenuye, weene biname bine piba maramara tomi me jaabelanemuye. Pepu mule lui miiji lica gyene. Weene gone biname bine jaatranimuye teeme gwidape poto cidi me. Pepu ngene atwanena lui conocono gyene.

⁵Cäme ätrunga binamewale, cäme mene näteciye. Lui biname cina ai gawecewe poto cidi me dogweyame lica gemi, Acejiyame teebibine ituge jäjäcra ätrunga cabu dogwe ne pa jääpänepesi. Teepi miiji puupu cabu Acejiyame cama cirege lenaja, tabe lipu ituge jaji ceerame iyeta lui cina teeme täapume singi. ⁶Yepä, weene poto biname bine gawe me ituge acrana, ingle teepi gwidape cäco gemi. Pepu mule lui conocono gyene. Yoo, weene babo singi gemi dogwe biname täapume, yepä teepi laati bemi, lui cina weeme ireclota ne mäpu me jaawenusi? Cuta teepi laati bemi, lui cina weebibine atraname iwadininusi rarekaake awecna poto cidi me? Teepi lui dogwe biname gemi! ⁷Teepi peete nemi lui cina niya mene jiicemusi weeme Yageyame me miiji ngii poto cidi me.

⁸Yoo, toraca mule pisi nyene Oogäräneji Mene cabu egä, “Maane miiji biname bime täapume singi lenaja, maane lipu mäame täapume

singi birige.” Weene peei cotre mene cāngena liba jaawenuye, peei lui miijirage gyene, ⁹yepā weene biname bine liba jaabelanemuye miijimiji cābletāāpe poto cidi me, weene peei cotre mene ne jaatropangtuye. Pui lui niiya mule gyene. ¹⁰Pui yepā matikolā cotre atropangta name pi, weene epu pana gemi egā weene iyeta cotre bine jaatropangtemuye, ¹¹ingle Acejiyame lui te itu jiicuji egā, “Sargi mule gone,” tabe cuta jiicuji egā, “Gone biname ne budre me yaagluye.” Weeme nuuja lui te licarage sargi mule jaawenuge, yepā tabe liba nuuja biname ne yaagluge, tabe peei lui cotre ne jaatropangtuge. ¹²Yoo, weeme atrana cirege pui cotre cabu me lui te biname bine yāāsecrāremuge. Peei name pi cāngena ire weene ngena ne jaawenuye piyepu ngena jiicuye. ¹³Ingle naace popi laati te biname ne owecu liba lica jaawenuge, pui te owecu ne lica cirege pāpāna atrana padare cabu. Yepā, lui cina nuuja biname bine owecu jaawenemusi, Acejiyame me owecu cuta pisi nyene teeme tääpume.

Ätrunga Aboclomtāneji Gyene Miiji Waweneca cabu ca

¹⁴Cāme ätrunga binamewale, ngena miiji gyene biname te iicaname egā, “Cane ätrunga biname gāne,” teeme waweneca liba miiji lica gemi? Ätrunga liba mene taatu, pepu ätrunga ibibi lica gyene biname ne niiya cabu ca asatame. ¹⁵Yoo, mime ätrunga wawewale piyepu ngulewale liba piti nemi deedei piyepu cābletāāpe cāco, ¹⁶ngenome weeme yepā te teebibine jaajemuge egā, “Yewo! Acejiyame weene cama gyene. Weene deedei cāngena läbitininuye, cāngena inajininuge,” yepā tabe te lica yāācāremuge cābletāāpe piyepu deedei? Peei nuuja miiji lica gyene. ¹⁷Yoo, lui biname te Acejiyame poto cidi me jaatrunzuge, yepā teeme mene lica jaawenuge, teeme peei ätrunga papa gyene, toraca lica gyene.

¹⁸Gone apu jiicemuye egā, “Yepā biname teeme miiji ätrunga pisi nyene, yepā nuuja teeme miijirage wawena pisi nyene.” Eewe, weene äblicāco ätrunga ne aboclomta waweneca cāco ca. Siige, cane cāme ätrunga ne weeme tääpume eboclomtenine cāme miijirage waweneca cabu ca. ¹⁹Weene jäätrunguye egā, “Yepā taatu Acejiyame pisi nyene.” Yoo, peei miiji gyene. Niiyaniya cable cina cuta peei umle cama icrajinige, siige teepi wālu gemi, yepā nuuja singi lica gemi Acejiyame me singi wawename. ²⁰Weene buduma gone! Nāā, pajecu lica gyene egā wawena cāco ätrunga lui papa gyene? ²¹Weene mime kaakesaare Abrahamo poto cidi me ngene jotwananineye, tabe lipu Acejiyame me singi ne jewenuji, siige piba conocāco me äbituji Acejiyame me opo gaabe je. Tabe teeme bāgrā Isacako Acejiyame ne ecāruji, kula dade papa cabu ecituji. ²²Abrahamo Acejiyame ne toraca jitrunguji, peei name pi Acejiyame me mene ne ecatuji teeme singi wawename. Teeme ätrunga epucāco me äbituji teeme wawena cabu ca. ²³Pipu pi toraca me äbituji Oogārāneji Mene lui jiicenige egā, “Abrahamo Acejiyame ne jitrungige,

siige teeme ätrunga name pi Acejiyame teebine einige conocäco ca.” Yoo, biname cina teebine yaainusi “Acejiyame me biname” ca. ²⁴Piba mine umle egä biname cina Acejiyame tääpume kälyä läbitininusi teeme waweneca cabu ca. Mine äblicäco waweneca mime ätrunga cabu ca äyeb lengta.

²⁵Cuta pepu äbituji ero magebi Rahaba tääpume. Tabe Acejiyame me opo gaabe conocäco äbituji teeme wawena cabu ca, tabe liba Israela biname bime neeneni cubu ire biname bine teeme mete cabu me aacanuji ämlitame, piba teebibine teeme cubuyame bau ca aasatuji, jäätyepuji nuuja gaabe cabu.

²⁶Yoo, biname me tääpe liba seemo cäco gyene, pui biname te budre. Cuta pui biname me ätrunga liba miiji waweneca cäco gyene, peei ätrunga te budre.

Mage Mäpu Gyene Wätä ne Cängena Ire Atwime

3 ¹Cäme ätrunga binamewale, miiji weeme nesae biname taatu abiberäja kaakesea pa yaacatepesi, ingle cine lui abiberäja biname gemi, cine toraca mule umle cire läbitinijago. Peei name pi cine liba nuuja mule wawena, cime mäpu daremu baborage cirege nuuja biname bime daremu cabu ca. ²Yoo, mine iyeta conocono jaawenemusi. Biname lui te conocono mene lica jicemuge, tabe conocäco gyene, piyepu ibibi gyene teeme tääpe iyeta cängena ire atwime. ³Yoo, mine matikolä ayana gwidape ne cooso me tage cabu yaacitusi, amlemanteji nee-neni sea ca. Mine peei sea bine joomlemusi cooso ne pui ca yaablawäjusi. Cooso te piba mime singi gaabe ne yaacatuge otnime. ⁴Cuta poo poto cidi me ngene jwaatwananinago. Poo lui babo-rage gwidape gyene, cuta babo buuwe te poo ne yaacananuge, yepä pisi nyene waapo wärega. Peei matikolä gwidape ca waapo biname te baborage poo ne yaablawäjuge teeme singi gaabe cabu otnime. ⁵Biname me wätä pepu pana gyene. Ngänuge matikolä gwidape, teeme kaakesea lui baborage gyene.

Yoo, muye wiiryere cuta matikolärage gwidape gyene, yepä ibibi gyene babo glunu ne uubuderame. ⁶Nuuja taje mime wätä lui muye wädräji pana gyene. Mime wätä cabu ca tasatanuge bucurage niiyaniya mene. Yoo, epu pana muye wädräji lipu pisi nyene muye ngalebora, mime wätä cuta pisi nyene mime trupa ngalebora. Mine äblicäco uucratna teeme niiyaniya mene cabu ca. Niiya mene te iyeta mime ireclota ne sabe jaawenuge, epu pana budni te iyeta gwidape bine lipu teeme gaabe cabu yaabemuge. Satani mage umle gyene biname bime wätä oomlaname teeme niiya kaakesea waweneme. ⁷Iyeta maramara opoyame cibi piyepu ele, piyepu biicwale, biname cina umle peei bine oomläjeca teeme singi waweneme, ⁸yepä biname te licarage teeme wätä ne cängena ire atwi. Mine ibibi lica gemi mime wätä mene bine iibaname. Mime niiya mene

te mime nuuja biname bine ngenecu mäpu me jaawenemuge. ⁹Nuuja taje mine wätä mene ca mime Yageyame Babe ne eso yäacärusi. Piba nuuja taje mine peei yepä wätä ca mime binamewale cama jääcelusi, Acejiyame lui bine teeme pana me itu jewenemuji. ¹⁰Miijimiji mene niyaniya mene yepä tage cabu ca täsuge. Cäme binamewale, peei mule miiji lica gyene. ¹¹Mite niye piyepu cärmeärme niye licarage yepä waja cabu ca tasatäsi. ¹²Mine äblicäco neenenen maramara opo kuu bine yepä uli cabu ca päpäna. Mine äblicäco uli kuu ne seeasea cabu ca äwäcuta. Piyepu mine äblicäco mite niye ne iitana malu cabu ca caapereniye luma. Yoo, miiji lica gyene miiji mene piyepu niya mene yepä tage cabu ca äsecerera.

Toraca Umle Lui Apu Gyene

¹³Weene liba toraca umle cama gemi, cängena inajipi miiji mule taatu wawename. Cuta piyepu weene liba lica nuuja biname bine jaajananemuye weeme miiji waweneca poto cidi me, weene piba toraca umleumle biname gemi. ¹⁴Yepä, weene liba claabe läbitininuye nuuja biname me miiji täapume, coo weene liba jäje ngene jwaatwananinuye weeme taatu miiji täapume, piba weene gone apu jicuye egä, “Cine temi umlerage biname.” Peei lui walya gyene. ¹⁵Pepu umle te lica täduge cabucewe ca, yepä peei lui ai gawecewe me ngene atwanena gyene. Pepu umle lica gyene Aceji Seemo bau ca, yepä Satani bau ca gyene. ¹⁶Yoo, pui cewe cabu luma biname cina claabe piyepu ämugetna läbitininusi teeme nuuja biname te liba miiji jääpänuge, piyepu iyeta biname bime ngene atwanena luma teeme poto cidi me yaacrajuge, äcela puma birige piyepu iyeta nuuja niyaniya mule. ¹⁷Yepä, pui umle lui Acejiyame bau ca conocäco gyene. Peei umle te singi gyene biname cina poode cama lenajame, peei umle te owecu gyene nuuja biname bime täapume, cuta peei umle te nuuja biname bime mene yäatecijemuge, nuuja biname ne owecu cama yäätityäruge, miijimiji mule jaawenemuge. Peei toraca umle te lica biname bine maramara ire jaatwemuge teeme täape liba mara coo teeme gwidape liba nesae. Peei toraca umle te lica mara ngene atwanena yaacwabuge mene mitemite ca. ¹⁸Biname lui cina singi poode cama lenajame teepi nuuja biname bine owecu jaawenimusi, piba pui biname bime bau ca miiji mule ne jääpänusi.

Gone Ai Gawecewe ne Biname me Jaawenuye

4 ¹Ngena gyene inge weene claabeclabe lenajame piyepu mene abajame? Peei mule cina saacluge weeme ngene atwanena cabu ca, iyeta lui gemi weeme singi cabu je. Cuta peei cina laglinusi weeme cabu. ²Weeme poto biname cina singi gemi gwidape täapume, yepä äblicäco waadana, peei name pi teepi singi nuuja biname ne aglime. Poto biname

cina gwidape täápume baborage singi läbitininusi, yepä teeme täápume gaabe lica birige päpäname. Teepi piba claabe cama yaacrajuge, nuuja cama jääcelusi. Yoo, teepi teeme singi gwidape ne lica jääpänusi, ingle teepi peei täápume Acejiyame ne lica yäätineräjusi. ³Nuuja taje teepi Acejiyame ne yäätineräjusi, yepä cuta lica jääpänusi, ingle teeme ngene atwanena lui conoconorage gemi, teeme taatu singi cabu yaacrajuge. ⁴Weene liba pepu mule bine jaawenemuye, weene piba epu pana gemi ätecija cäco magebi liiyepu lui te baborage singi gwene teeme rooriye ne abmalame nuuja ne acatame. Nää, weene umle lica gemi egä lui biname te ai gawecewe ne biname me jaawenuge, tabe cuta pui padare cabu Acejiyame ne cubuyame me jaawenuge. Ingle lui te baborage singi gyene ai gawecewe me mule täápume, tabe äblicäco cuta Acejiyame me biname me lenaja. ⁵Coo, weene pama apu jingenige egä Oogäräneji Mene te papa jiicenige egä, “Lui seemo ne Acejiyame mime trupa ngalebora itu secituji, pui te kokre singisingi cama gyene.” ⁶Yepä, teeme babo miiji, lui nicärininige, kokre gyene cuta peei cabu ca. Oogäräneji Mene apu jiicenige egä, “Lui biname te singi teemämu babo me äbitame, Acejiyame teebine jäägyuge, yepä lui biname te Acejiyame ne opo gaabe me yaacituge, Acejiyame teebine yäätityäruge.”

⁷Yoo, peei name pi weene Acejiyame ne weeme trupa ecäreye teeme singi wawename. Satani ne kaake ca icelyäreye, tabe piba weeme bau ca pa lucrepi. Weene Acejiyame gome me naaclege, Acejiyame piba weeme bau pa yaanajege. ⁸Yoo, niiya mule biname, weene weemämu äcisäjipeye! Lui cina neeneni ngene atwanena cama gemi, weeme ngenecu emacetnäjemeye Acejiyame täápume singi äbitame. ⁹Weeme niiya mule name pi weene miiji ngenecu mäpu äbitipeye, ele ingenitninege. Weeme papa ngange äwäcna ebmaleye, mäpu ngene atwanena täápume ngene jotwanineye. Weeme gege siige, ingle babo mäpu pisi nyene. ¹⁰Weene umle äbitineye egä Yageyame me opo gaabe je weene miiji lica gemi, tabe puma cita ca weebibine toraca ngenecu miiji me pa jiwenipi, toraca gege piba picäripi.

Mime Binamewale bine Iicetna Gone

¹¹Cäme ätrunga binamewale, gone niiya mene jaji weeme nuuja potu cidi me. Lui te teeme biname ne jiicetnuge, tabe cuta Acejiyame me cotre mene conocono me jaawenuge, ingle cotre mene te jiicenige egä weene miiji biname bine owecu wawena, yepä iicetna lui owecu lica gyene. Peei lui weeme kaakesea lica gyene cotre ne atraname egä miiji gyene acatame, coo niiya gyene peei name pi miiji abmalame. Yepä, weene miiji cotre ne cängena jaawenuye. ¹²Pisi nyene yepä taatu cotre oogära biname, lui te ibibi gyene biname bine toraca atraname, piba potu biname bine niiya cabu ca äsecreraame waadename, cuta nuuja potu bine

äyeb lengame. Peei name pi maane, baa laasi näte lui te mäame biname ne jaatranute?

Gone Mene Papa Icema Weeme Mijji Kaakesea poto cidi me

¹³Yoo, căme mene matikolä pisi nyene teeme täápume lui cina Acejiyame căco teeme kaakesea poto cidi me jaatranusi, piba jicemusii egä, “Page coo pama ciyeciye, cine piyemopo pui babo cewe me naclenige. Cine yepä kămäge puma pa ninajipi aletnale-tna kaakesea wawena täápume. Cine bucurage rarekaake pa jääpänemepesi.” ¹⁴Agesa căme mene pepu biname täápume; weene umle lica gemi ciyeciye ngena te äbitenige! Weeme ireclota leca lui kroke gläasi pana gyene, lui pisi nyene matikolä padare piba läyeb lingtuge. ¹⁵Weene apu cire jicejiye egä, “Mime Yageyame te liba singi gyene, cine piba ninajininige, ai kaakesea ne jewenenisi, peei ne piyepu cuta.” ¹⁶Weeme kaakesea piyepu weeme ireclota lui Acejiyame me ime cabu temi. Gone weeme kaakesea täápume papa iicetneja, epu pana egä weeme ireclota lui weeme ime cabu sine. Acejiyame singi lica gyene pepu mule täápume.

¹⁷Yoo, lui biname te liba umle gyene egä, “Cane mijji gäne peei gaabe cabu otnime,” yepä tabe lica läduge, tabe peei lui niya mule ne jaawenuge.

Cuta Dogwe Biname cina Teeme Daremu Cirege Păpäna

5 ¹Căme mene cuta pisi nyene gwidape dogwe biname bime täápume. Weene ele ingenitninege ajij mene cama, ingle măpurage daremu pisi nyene weeme täápume. ²Weeme gwidapegwidape sabe läbitininusi, weeme mijjimiji căbletăäpe potäte cina jaatecimusi. ³Weeme rarekaake juju läbitininusi. Peei juju te weebibine opo iwatnininuge egä weene ceera căco biname gemi. Muye te gwidape ne lipu yaataclomuge, peei rarekaake te waniba pana weebibine sabe cire jiwenipi. Gwidape rarekaake weene tomitomi jaawenemuye ai cerăcerăgăäbu poto bimu täápume. ⁴Weene lica toraca daremu yăăcăremuye pui biname lui cina weeme calwacupi cabu kaakesea jaawenemusi. Teeme aitna mene itecijinege! Acejiyame mime Kokrerage Yageyame ituge ätecija teeme ala. ⁵Ai gawecewe cabu weene iyeta weeme singi deedei piyepu gwidape ituge aletna. Weene weemămu ngeerangera cibi pana ire latwinuye. Yoo, agli täápume bimu te bii tatyaramtuge. ⁶Weene biname bine ablaweja biname bau me papa yaawademuye, teeme gaabe liba lica gyene asatame. Poto cina cuta budre weeme bau ca itu jääpänepesi, siige.

Mene Awagrija piyepu Irecu Ätumuta poto cidi me

⁷Yoo, căme ätrunga binamewale, agesa mene weeme täápume lui cina mime Yageyame me acnenuta täápume jewagrijenisi. Teeme trämă

cāngena inajipi, epu pana gije liteta biname liiyepu, lui te calwacupi kuu ne jaawagrijuge. Niinäce ngupe te tāduge, gije ne uutaname jaawenuge. Ingwe ca ngupe te liba tāduge, gije cepa ne piba yoororuge, siige kuu jaawenuge. ⁸Weene pepu pana jewagrieniye, umle cama egā mime Yageyame me acnenuta bimu lui cudecewe lica gyene.

⁹Cāme ātrunga binamewale, gone weeme nuuja bine jāāngājemuye, piba Acejiyame te weebibine lica birige atrana. Weene umle egā mime atrana biname cudeceweraige lica gyene. ¹⁰Cāme ātrunga binamewale, sasa mename biname poto cidi me ngene jwaatwananinago, lui cina mime Yageyame me ngii cabu mene jiicemusi. Teeme pana mule ecateye lipu cewe oocana cabu āmyemutaname. Teepi lica nuuja biname ne jāāngājusi, yepā cāngena jaawagrijsi teeme āsecrera tāāpume. ¹¹Page teepi babo miijirage gemi, ingle teeme ireclota cabu teepi ātrunga gaabe ne lica ebmalujisi, māpu ne liba jāāpānusi. Yoobu lui pepu biname ge. Maramara māpu cina teeme bau me secluji, yepā tabe Acejiyame ne jitrunguji teebine asatame. Teeme ireclota cabu ca mine opo yaawatnusi Yageyame ne, tabe lipu babo miiji ireclota ingwe ca Yoobu ne ecāruji. Mime Yageyame me waadena mule pepu pana gyene babo owecu cama.

¹²Cāme ātrunga binamewale, aghesa baborage gwidape: Weene liba toraca mene singi iicaname, gone nuuja ngii cama awejena weeme mene toraca me ābitame, gone gawecewe ngii cama iicana, piyepu gone cabucewe ngii cama iicana, coo cuta nuuja ngii cama gone iicana. Weene miiji iicana egā, “yoo,” coo “lica”. Peei mene taatu jiicuye, piba weebibine lica atrana birige egā ‘niiya mule biname gemi.’

¹³Weeme yepā te liba māpu cabu yaanajuge, tabe miiji Acejiyame bau irecu ātumutame. Weeme yepā te liba gege cama, tabe miiji Acejiyame ne awepyerāja uupera cama. ¹⁴Weeme yepā te liba pita cama yaanajuge, tabe miiji ātrunga ingle modamoda biname bine ala asogleca teeme gome irecu ātumutame. Teepi te migi ca yaaganusi mime Yageyame me ngii cabu. ¹⁵Teeme irecu ātumuta te pita biname ne miiji me pa jaawenepi, teepi liba ātrunga cama jaawenusi. Mime Yageyame te piba pita biname ne pa yaarpinantepi, piyepu teeme niiya mule bine yāāyebhengemepi teeme cabu ca. ¹⁶Peei name pi weeme niiya mule weemeweme ajanipeye piyepu weemeweme tāāpume irecu ātumutanipeye weene miiji me ābitame. Baborage kokre te tāduge Acejiyame bau ca, biname te teeme ngenecu bora liba lamacetrnājuge, piba cāngena irecu lātumutuge tabe. ¹⁷Eliya me irecu ātumuta lui pepu kokre cama ge. Tabe binamerage ge mine liiyepu, yepā tabe liba Acejiyame bau irecu ātumutuji ngupe ne iibaname, piba ngupe te lica pui gawe cabu seciruji nesae kāmāge cebo ngalebora. ¹⁸Pui padare te liba apiruji, tabe cuta irecu ātumutuji. Ngupe te dume cabu ca piba sitramuji, piba pui gawe cabu gije cina cāngenarage uutinujsi.

¹⁹Cäme ätrunga binamewale, weeme yepä te liba läyebtingtuge Acejiyame me toraca gaabe cabu ca, weeme nuuja te liba teebine yaawecnistuge toraca gaabe cabu me, peei lui babo miijirage gyene. ²⁰Ai poto cidi me ngene ca egleye egä biname lui te nuuja ne teeme niiya gaabe cabu ca saawecnistuge, pui biname me seemo ne cuta saasatuge niiya puupu cabu me otnime, cuta piyepu teeme bucurage niiya mule bine yiisibrecmuge.

Yoo siige, cane ngii Yakobu, cäme mene ngälu peecwi yene.